

VENDIM
Nr. 76, datë 2.2.2022

**PËR PËRBËRJEN DHE MËNYRËN E ORGANIZIMIT E TË FUNKSIONIMIT
TË KOMISIONIT QENDROR TË STATUSIT “FËMIJË NË PËRKUJDESJE TË
REPUBLIKËS” DHE SEKRETARIATIT TË TIJ**

Në mbështetje të nenit 100 të Kushtetutës dhe të pikës 2, të nenit 11, të ligjit nr. 129/2021, “Për statusin ‘Fëmijë në përkujdesje të Republikës’”, me propozimin e ministrit të Shëndetësisë dhe Mbrojtjes Sociale, Këshilli i Ministrave

VENDOSI:

1. Komisioni Qendror i Statusit “Fëmijë në përkujdesje të Republikës” kryesohet nga ministri i Shëndetësisë dhe Mbrojtjes Sociale dhe në përbërje ka këta anëtarë:

- zëvendësministrin e Mbrojtjes;
- zëvendësministrin e Financave dhe Ekonomisë;
- zëvendësministrin e Brendshëm;
- zëvendësministrin e Arsimit dhe Sportit;
- dy përfaqësues nga organizatat jofitimprurëse në fushën e mbrojtjes së të drejtave të fëmijëve ose të drejtave të njeriut.

2. Komisioni Qendror i Statusit “Fëmijë në përkujdesje të Republikës” mbështetet nga një sekretariat, funksionet e të cilit kryhen nga sektori përkatës për mbrojtjen e fëmijëve, pranë Ministrisë së Shëndetësisë dhe Mbrojtjes Sociale. Sekretariati kryen këto detyra:

- a) mbledh të gjitha kërkesat e depozituara për përfitimin e statusit;
- b) krijon dosje të posaçme për çdo aplikim;
- c) verifikon paraprakisht nëse dokumentacioni i depozituar nga aplikuesi është i plotë, sipas përcaktimeve në udhëzimin e miratuar nga kryetari i Komisionit për përcaktimin e formatit të kërkesës, llojeve të dokumenteve që paraqiten për marrjen e statusit “Fëmijë në përkujdesje të Republikës”, si dhe të kushteve teknike të plotësimit të tyre dhe, nëse ka mungesë ose parregullsi, njofton aplikuesin për plotësimin e tyre;
- ç) harton projekttagjendën dhe të gjithë dokumentacionin e nevojshëm për çdo mbledhje;
- d) njofton anëtarët për datën e mbledhjes dhe u vendos në dispozicion dokumentacionin përkatës.

3. Marrja e vendimeve të Komisionit Qendror të Statusit “Fëmijë në përkujdesje të Republikës” kryhet sipas dispozitave të ligjit nr. 8480, datë 27.5.1999, “Për funksionimin e organeve kolegjiale të administratës shtetërore dhe enteve publike”.

4. Komisioni Qendror i Statusit “Fëmijë në përkujdesje të Republikës” mblidhet me kërkesën e kryetarit të Komisionit dhe ushtron këto detyra:

a) shqyrton dokumentacionin e dërguar nga subjektet propozuese dhe kërkuese për dhënien e statusit “Fëmijë në përkujdesje të Republikës” dhe verifikon, paraprakisht, nëse janë plotësuar kriteret formale për paraqitjen e propozimit, sipas përcaktimeve në aktet nënligjore të miratuara nga Komisioni;

b) njofton me shkresë zyrtare, brenda 5 (pesë) ditësh, subjektet propozuese për pranimin paraprak të kërkesës dhe vijimin e procedurës administrative ose për plotësimin e të metave lidhur me kriteret formale të propozimit, duke caktuar një afat prej 10 (dhjetë) ditësh pune për plotësimin e këtyre të metave;

c) bashkëpunon me institucionet e tjera publike gjatë shqyrtimit administrativ të një çështjeje për dhënien e statusit “Fëmijë në përkujdesje të Republikës”;

ç) merr vendime të arsyetuara, brenda 30 (tridhjetë) ditësh nga depozitimi i propozimit për dhënien e statusit “Fëmijë në përkujdesje të Republikës”, për:

i. dhënien e statusit “Fëmijë në përkujdesje të Republikës” dhe përcakton masën e shpërblimit financiar sipas kriterëve ligjore;

- ii. rrëzimin e kërkesës duke mos dhënë statusin “Fëmijë në përkujdesje të Republikës”;
- d) njofton, me shkresë zyrtare, brenda 5 (pesë) ditëve, subjektin propozues për vendimin përfundimtar të Komisionit Qendror të Statusit “Fëmijë në përkujdesje të Republikës”;
- dh) rishqyrton vendimet e tij, të cilat, bazuar në një vendim gjykate të formës së prerë, janë anuluar apo shfuqizuar;
- e) ngarkon stafin teknik të Komisionit Qendror me detyra specifike administrative për çështjen që shqyrton;
- ë) miraton udhëzimin për kriteret formale të kërkesave apo propozimeve dhe dokumentacionin për dhënien e statusit “Fëmijë në përkujdesje të Republikës”, që depozitohen nga subjektet propozuese në sekretarinë e Komisionit, sipas afateve të përcaktuara nga Komisioni Qendror;
- f) raporton, të paktën 1 (një) herë në vit, pranë Këshillit të Ministrave, për punën e kryer në kuadër të kompetencave të tij.
5. Shpërblimi për pjesëmarrje në mbledhje bëhet sipas përcaktimeve në vendimin e Këshillit të Ministrave për përcaktimin e masës së shpërblimit të anëtarëve të këshillave, bordeve ose komisioneve të përhershme të njëjësive të qeverisjes qendrore.
6. Ngarkohen Ministria e Shëndetësisë dhe Mbrojtjes Sociale dhe Komisioni Qendror i Statusit “Fëmijë në përkujdesje të Republikës” për zbatimin e këtij vendimi.
- Ky vendim hyn në fuqi pas botimit në Fletoren Zyrtare.

ZËVENDËSKRYEMINISTËR
Arben Ahmetaj